



Timbalan Pengarah Penguatkuasaan (OPERASI) Kementerian Perdagangan Dalam Negeri dan Kepenggunaan (KPDNKK), Rosli Ahmad bersama anggota Polis Marin melakukan tinjauan di sepanjang sempadan bermula dari Kuala Takbai sehingga Kubang Pak Hitam, Pasir Mas. - NSTP/Nik Abdullah Nik Omar

## Kerjasama semua agensi penguatkuasa kekang penyeludupan di Kelantan

Oleh Siti Rohana Idris  
bhnews@bh.com.my

**TUMPAT:** Kementerian Perdagangan Dalam Negeri dan Hal Ehwal Pengguna (KPDNHEP) Kelantan mencatatkan 42 kes berkaitan penyeludupan barang kawalan sepanjang tahun ini.

Timbalan Pengarah Penguatkuasa (Operasi), Rosli Ahmad, berkata semua rampasan merangkumi barang kawalan bersubsidi, antaranya tepung gandum, gula, minyak masak dan petrol yang bernilai RM225,176 itu adalah hasil kerjasama beberapa agensi penguatkuasa lain.

"Daripada jumlah itu, 22 kes dijalankan oleh Pasukan Polis Marin (PPM); Pasukan Gerakan Am (10); Polis Diraja Malaysia (enam); Agensi Keselamatan Sempadan (dua) dan masing-masing satu oleh Jabatan Kastam Diraja Malaysia (JKDM) serta Angkatan Tentera Malaysia (ATM).



"Kami berharap kerjasama semua agensi terbabit dapat mengekang ketirisan barang kawalan, sekali gus merungkai masalah penyelewengan yang berlaku dalam pengagihan subsidi barangan keperluan asas kepada kumpulan sasar yang layak," katanya.

Beliau berkata demikian pada sidang media di Markas Pasukan Polis Marin (PPM) Wilayah Tiga, Pengkalan Kubor di sini, hari ini selepas melakukan tinjauan menggunakan bot ronda milik PPM di sepanjang sempadan bermula dari Kuala Takbai sehingga Kubang Pak Hitam, Pasir Mas.

Rosli mengakui sempadan Kelantan dengan Thailand sepanjang 191 kilometer bermula dari Pengkalan Kubor, Tumpat ke Kalai, Jeli agak sukar dikawal, tambahan pula terdapat ratusan laluan tikus, namun beliau yakin dengan kerjasama semua agensi penguatkuasa, penyeludupan dapat dikekang.

Menurutnya, kerjasama dengan agensi lain adalah strategi terbaik dalam menangani masalah penyeludupan dan tugas itu kini dilihatnya semakin kuat dengan pembabitan PGA yang memulakan tugas mereka pada 12 Jun lalu.

"Hari ini kita menyerahkan buku garis panduan penerimaan kes Pasukan Gerakan Am (PGA), menandakan bermulanya kerjasama antara dua agensi kami dalam membanteras penyeludupan barang kawalan di sempadan Malaysia-Thailand.

"Dalam buku garis panduan itu ada maklumat mengenai rampasan barang kes, untuk sitaan serta tatacara penyerahan barang rampasan.

"PGA baharu mengambil alih tugas di sempadan dan kami sedia memberi kerjasama dan segala maklumat yang diperlukan bagi sama-sama menjaga sempadan negara daripada ketirisan barang kawalan," katanya.

